

Fa anc adina basegn

10 onns Plenum grischun da dunnas

■ (anr/lw) Il Plenum grischun da dunnas è vegn fundà avant diesch onns. «Nus al duvrain fin ch'el n'è betg pli necessari», vev'ins ditg da quella giada. En il fratemp han ins cuntanschì blier, ma basegn fa l'organisa-ziun anc adina, sco ch'ins po legger en la gasetta da giubileum.

Per ses diesch onns ha il Plenum grischun da dunnas survegnì nov curaschi, scriva sia secretaria *Gerti Schönbeck* en l'editorial dal numer da giubileum da la revista «Novitads dal Plenum da dunnas». Quai cun far in nov styling da ses logo, in prospect ed üna homepage. Il motiv per avair fundà la società è inditgà sin il frontispizi dal prospect: «Avant diesch onns essan nus dunnas stadas obligadas da'ns dustar per che l'emprima cussegliera federala vegnia elegida.» Ch'i sa tracta da l'emprima nun è dal tutfatg precis. Sco emprima candidata uffiziala ha pers *Lilian Uchtenhagen* la tscher- na cunter *Otto Stich* dal 1983. E dal 1984 è daventada *Elisabeth Kopp*, che ha pli tard stuì demisiunar, l'emprima cussegliera federala. Dal 1993 n'è *Christiane Brunner* betg vegnida elegida, e quai ha insomma dà l'impuls per la fundaziun dal Plenum grischun da dunnas, sco ch'ins po concluder er da las contribuziuns da las duas confundaturas, *Angela Cantieni Locher* e *Nicoletta Noi-Togni*, en la revista da giubilum.

In pitschen chametg ha dà en

Sco che descriva *Angela Cantieni* è la fundaziun da l'organisa-

ziun. «In pitschen chametg ha dà en en Grischun», scriva ella. Che sia chascha da brevs saja stada tgemblada per emnas. Ils 14 da zercladur dal 1993 – damai al di da la chauma da dunnas – ha g' lieu la radunanza da fundaziun dal Plenum grischun da dunnas, quella giada cun 171 commembras. L'emprim na vulev'ins betg ina società cun structuradas «patriarcalas», leg'ins, ma il model cun in «team da minz» (Kernteam) che aveva plitost funcziuns intermediativas e coordinatoricas e cun in «team d'aziun» cun funcziuns plitost organisatoricas nu para da s'avair verifitgà. Oz è il Plenum grischun da dunnas organisà en furma da società che vul cuntanscher che la paritad tranter dunnas ed umens vegnia realisada sin tut ils nivels socials e politics. El vul sensibilisar il public e las organisaziuns per ils interess da las dunnas, el sustegna las dunnas da s'engaschar en la società ed en la politica, el sa metta en per problematicas da dunnas e blier auter pli.

Che cuntanschì haj'ins blier, leg'ins en la gasetta da giubileum. In success concret è il biro chantunal per la paritad tranter dunnas ed umens. Plinavant para la lavur da sensibilisaziun dad avair purtà fritg. Che la realisaziun da la paritad saja però dira, vegn scrit. Quai demussa er il fatg che *Margrit Raschein Patt* e *Clelia Meyer Persili* n'èn betg vengnidas elegidas en la dretgira administrativa respectivamain en il

cussegl da banca. *Anna Ratti*, che ha ditg sin la «Piazza grande» en occasiun da las festivtads per ils 200 onns che il Grischun fa part da la confederaziun, ch'i saja «pli simpel da far politica cun la chatscha che cun temas da dunnas» para dad avair in pau raschun.

Tant sconfittas sco er victorias

Dischillus è il Plenum grischun da dunnas, tranter blier auter, che la nova constituziun chantunala na cumpiglia nagin artitgel specific en vista a las dunnas e ch'ella resguarda insomma memia pauc ils interess da las dunnas. Sco resultats positivs da l'ultim temp vegnan percunter numnads l'approvaziun da l'interruptziun da la gravidanza fin ad in tschert termin, il mantegniment dal biro per la paritad tranter dunnas ed umens e – en l'ultima votaziun chantunala – l'approvaziun da la tgira d'uffants complementara a quella en famiglia.

In punct culminant en l'istorgia dal Plenum grischun da dunnas è stà l'onuraziun cun il premi «Dunna 2001» che vegn surdà da la secziun grischuna da la Uniun svizra da las academicas e da l'Archiv cultural grischun da dunnas. Sco adina envida la società a sia radunanza generala per ils 14 da zercladur. Ella vegn cumbinada cun ina tschaina e cun il concert cun *Les Reines Prochaines* che represchentan lur nov program «Protests e vases». Quista festa vegn organisada dals Dis culturals da dunnas.



Nov curaschi – Il Plenum grischun da dunnas festivescha ses diesch onns cun in nov prospect e cun in'ediziun da giubileum da las «Novitads dal Plenum da dunnas».